

朱
太
復
乙
集

朱太復乙集卷之二十三

五湖朱長春太復著

記

邑揚侯志尹公生祠去思碑記

自昔循吏居有功德於民民去而思尸祝之其來
尚矣要始乎治草乎濫今郡縣之碑殆徧天下或
干譽以市譽或據津而人豔傳之或調諧士大夫
倡建鼓飾其美大氏位未去而碑成既去輒有漫
漶議其後矣如此安見所謂飲德而懷不朽乎抑

其未徵諸民耶烏程入

明興二百年言循吏以楊侯為第一侯遷行十年
紀石願闢焉民思楊侯輒泫泣憤歎相與結議告
當事者謀廟祀之歷數年三請會徐侯應鶴來訪
舊隨畫有概焉主其議立祠宮岷山之南仍勒石
頌其功諸父老以長春為不阿雅稱知侯也令作
記予感其事愾然歎曰美哉嗟乎吾乃今知民之
不可誣有是夫夫凍者思暎旅者思土去日愈遠
思愈深結於真也矯行塗飾費靡目前誰知其雌

雄必相其微而始定焉此可以徵去矣咨士于朝
不若咨于野其衆也民至思難欺其口無權而大
公無權故不勝于一時然經十餘年而公道著此
可以徵思矣侯坦夷無城風度肅然居廉平而政
不煩苛性噢咻愛民惟恐不生其當法凜如也所
居五歲緩科徭平冤滯興隄防除淫社清浮田勤
荒政倡教化禁媮靡城邑之間淳如其大要不阿
上官不假貴要杜曲請以平良善抑并兼而蘇息
窮獨陰行守義者雖微側寵禮之即富鉅家得保

安姦猾雖盱作不軌雖大豪無所融借而市里惡
少如婦焉門內之政井井宿吏無害不敢舒手訟
堂行鳥雀而門外寬然齊民如撫赤子也故侯在
時四境閤門飽食而卧不聞追呼雞豚聲交園窳
被野而今徵催督責公人旁午于道中家以下蕭
然啼鳴矣故家高門僮僕習舊橫行不堪因而不
逞亡賴數千人群起噪呼劫辱貴人大姓幽死至
起大獄聞於朝

天子檻車逮對廷尉上連御史案責追罷法夷替

亾等風俗囂然壞焉達掖之徒三號衆而譁連數
百群走市陵轢勢家挾公府而士多被罪不振也
故其君子思曰侯實惠我小人則曰安復庇侯衣
食衽席之善者曰吾無以為助不善者曰吾無藥
石而疾亾我富人曰侯息我業誰耗之貴人曰侯
在獨難我我乃無今日禍而貧獨矜愚遂至相聚
飲泣呼天呼父母不可止嗟乎此真乃所謂思哉
古之遺愛何加焉視彼漫漶賢不賢得失何如耶
二十年中吳興儲吏一太守及泉李公一楊侯為

政先後相似其民見思與碑祠皆十餘年而舉要
兩賢外亦別無祠乃知民可畏哉非甚功德曷得
此焉吾故特述而記之及其時會所慨以著于後
循吏之真有功德於民久而思者公名應聘字志
尹中都懷遠人萬曆癸未進士方同出令兩人相
知深相期予在舒公傍縣意節功能頗不負以奉
母喪歸魯拒其邑人之請祠不欲為世濫如公斯
無濫同心之言民口碑在云

太守陳志行公建築城南峴山通塘記

信夫甚哉水之為利害也。天地有偏，聖人不能遠能，唯因用而通塞，相之不得人。天地亦幾無能，其利萬物給而於地，負重其害，墊枯敗廬稼而於稼，重其治殺，盈濟虛引利，制害而害為利，重水地曰地之血氣如筋脉之通流，亢害承制要于粒民，則濬畝距川，始禹功明德遠矣。嗣後西門鄭白樊惠之渠興沃田富國食民，爰歌詠之主以起利天地之所無不闕去害水之害，故亟于利大矣。治二曰障曰疏，鄆于黃河金隄重而兼兩惠永其七門堰。

稱著蓋伊耆之坊庸事抑合禹蹟疏瀹水之道乎
太上貴因因利而利之法曰去其害馬故渠利于
無水之區而堰塘利于多水天下多水之地江南
為盛江南之浸其大三江五湖震澤為盛震蕩也
怒也一曰太湖綠湖三吳吳興為盛宅湖之陽上
流兩茗水發天目來壑於澤近當其匯而西迫洪
湍往往不及灑驟沸溢一日夜齊于舍民田可知
也故江南三湖之間歲多潦吳興常最西南萬山
百餘里黃梅霰諸谿谷水壯并三道下會于城南

峴山山以內郭西灣別一道深者三二十里其陸
進五六十里巖環蠹諸渠隨山來往往被水患又
最其田賦居烏程六之一其山兩南北條南盡峴
道場北盡康山由剎關分兩馳迤二十餘里赴城
遠山衆陡泉澍山中田居水中山圍水外濬為漾
三曰廟前白草蕩白夾山夾兩山也西環峴最大
納諸流波蕩而出一渠曰沈店橋橋夷岬口財容
刀南二橋白壇前曰百明內渠注隘外隄薄半阨
前臨南湖曰碧浪湖古曰峴山溪水壯則決堤倒

溢入併為害其來如彼其洩如此宜乎其患也久矣十年而五小浸即田連湖一望淼白廬屋浮萍水沙中若舟民流食于他止者菰蔞漁采屋給輒疾河魚死蓋萬曆十五六年大殺死飢疫垂半骸塞野而夾山以西存無什三如此而賦又可知矣其民驟告當事蒿目不得策則望洋歎今三十三年太守陳公來長者一意勸民日夜捐捐為求患害捍除以歸于利民又告之公行峴山望其流登降周度凡三登召父老謂曰吾知患所出矣損有

餘益不足天道也今則益分則損乃度唐自山川
壇北畫民舍南至百明橋古橋二益設新平橋三
允五內疏支渠廣深之連夾山引漢水淪分出於
五橋外塘辟古之半累高甃石為隄以捍湖溢緣
樹以木意意映湖山又南接古峴山橋廢按志疏
復之造盤山又西至峴山寺門止塘允備二百五
十丈有奇廣二丈六尺隄高七尺五寸役五閱月
不賦里不庸夫民晏然而功竣塘內允鄉區四田
畝四萬七千有奇圩圍四百九十有奇居人戶數

萬成欣平成庶幾夏甸中可得而食也。三老里正
施火等赴直指御史請刻石為碑記事額以杜侵
申其備便嗣功德永久矣。眾以道民不阿微為記
諸曰通塘志本利也。諸水皆通峴山後通湖故泛
峴山云太守公名幼學字志行別號筠塘無錫人
中萬曆己丑進士。

外史道民曰吏道多端歸以循民利之為久。府君
治三年初剪豪剔猾理沉逋詰盜申保親按行鄉
約問孝弟廣學宮集生徒知文斌斌已歸。洋梁治

道築塘飭然新也。一府君之利未若天地之利。南塘為最。塘自城達峴山。其南連蘇灣。文忠蘇公治。故隄在焉。兩堤於兩太守不朽。然而食民利縣矣。錢唐西湖古葑區。澱白蘇兩公先後濬。起隄蓄成湖。建閘灑溉田。萬世粒食之。今于湖為勝。六橋西陵。士女車馬樂盤游。甲天下。幾不知田之沃。利吳興之勝。峴山帶道場。浮玉立湖中。南湖於西湖亞。塘成數萬口。農謠鼓腹於中。一郡行春山水間。嚮尊歌舞于外。夫政猛則民騷。和則民樂。侈不急則

騷利則樂語曰難與慮始可與樂成詩云無德與
女式歌且舞至於歌舞而樂幾於忘忘乃大大乃
久

論

治論

董仲舒曰王者有改制之名無易道之實孔子曰
無為而制者其舜乎言其主堯而已此非治論之
效驗與然則繼治道同天下不與皆言舜禹之能
同道者也不能同道是亂天下矣是以巍巍恭已

而無間恭已無以已也無間焉同矣夫聖揆常一
世法互更更其不一以歸一統其世以合于聖聖
有二乎而曰更乎更弦而張鞞屋而脩不得已而
救其壞聖人之通同于窮者也未壞而更與于速
壞聖人憂其速之是以守之寧為夫才之取守而
不足以更乎為更之無用于才而不如守也孔子
申仍貫而戒改作為一長府也與哉治統統是貫
可仍且禁作而况聖聖之同條共貫者乎貫繩也
聯也繩乃承聯乃不渙以是統系之脉長而萌生

之類以有朽而繩聯一之無有繩聯于不朽而岐
二于一也何者道同世世同道同一也虞曰重華
夏曰敬承美一也伊訓咸有周箴無逸坊不一也
千穀合于國執百谷宗于大壑異之以疇能不同
而同之又疇為異孔子一以貫之述而不作述于
千百世之後而貫于千百世之上于稽其時則周
之季乎聖曠言湮道裂世壞而不作為何世有作
之時聖人無作之權權乘時則建法法更而道通
時不設權則建道道立而法統春秋聖人之寄統

于通易詩書禮則聖人之真通于統也曰貫其一
以統不一得吾統者貫于千百世上下一可也夫
統同有統無同然統一革曆齊政更化宜民異名
同出天地之元聖帝明王之治一是矣故曰至人
無已神人無功聖人無名名功忌德也爭噐也天
下之膠膠云云執已而欲異人其起于見功賣名
之為乎務已勝人而不知人遠何也所見所賣皆
外吾已而馳之則蝕之也聖人絕馳無蝕去外無
內統人無已

三代道窮論

表記聖人論三代道敝適而曰窮矣此聖人于世道治運人心大有概焉董子曰損周之文用夏之忠其議昉于此乎聖人今用泛周又曰如用泛先意微乎定哀之春秋見之每曰夏殷不足徵也又曰吾得夏時焉夏時近人而忠者也三代之政道各異尊親各偏試觀其所尚而世可知矣繼治者因反亂者革因樸而未備革詳而多防衣敝者染而改之改又改敝又敝上下日相御相變至于極

而莫如何則上下均歸周豐而有虞未施信而民
信之夏后未施敬而民敬之殷人作誓而民
周人作會而民始疑不戒而孚之謂信無辭也未
瀆之于不戒有不孚矣曰文命敷于四海文命之
于從欲有不從矣故敬之于信無心之于有心也
人生菟愚咳而無言學母而言言亦無言曰無名
之樸曰不雕之樸未有心也不戒之孚亦未有心
也毋抱肥肥于懷純純通而不以言愛而不知敬
不備不望上不深而鈎乎民之心民猶各安其心

而不疑于上之心上易事下易知天下一家萬物一體夏始撓民以命約其信而天下始不信矣解其成然動其欽然欽之有不親矣曰未厭其親未厭危之也猶有親焉降于帝之何有而猶未全于其身之有也蠢愚喬野樸而不文樸固道之所載未散之古生乎文固物之禕而性之鑿也不文是以能樸樸焉用文無鑿成成無禕一真倘其殺有不救乎救而善之而惡而反之乎殷一變而辭始瀆求始備周再變而民強而上窮上窮于所強而

愈強愈不勝下強于所窮而愈窮愈不堪勝夫水之濫觴也未遠泉可引而挹也及其赴海茫乎歸墟則望洋而嘆耳蟻穴之隄沙草可塞黃河始決犍竹可捍至于滔天徙邑而人力不可得而治矣故曰太上貴因其次親之有仍而因有變而因通之不倦變猶有仍也夏用仍殷周用變仍未厭親未全于親至殷而且尊于君薄於親至周而窮于親又窮于君故觀于治而赦可知也觀于赦而治又可知也觀于赦于治而世又可知也蠢樸愚野

之古處忽而不靜不恥搖搖始動矣動又動之搖
其本而披其枝則文揀質之過哉華發于木傷其
木文出于質滅其質由順而生之非揀而反之且
然傷滅之治病者正之不如滋而乃欲增之以為
揀元安得不傷病安得可復法安得而不窮是以
周窮而帝王之運窮明德之世胄窮井田封建經
法官制窮聖賢窮文字儒書又窮聖人有窺其救
而概乎其莫為挽矣故曰至矣不勝文人益也質
人基也無益之基不壞益而至不勝幾何不窮窮

于無可變而天為變乎當之所以生尅而人代之所以寡絕也。以聖人欲用後先而不得後世柰之何哉。周禮晚出未必真吾讀春秋傳諸侯不滿百其國君臣儀用軍賦盟會生死物禮何其煩與汰哉。又况于千八百國之交此必窮之道也。皆尚文之過也。小禁曰肇允彼挑蠹拚飛維鳥責之五曰東帛箋箋上曰白賁無咎然則周先王固已有憂窮哉。觀于六誥而知強民之不得已而以文敷之敷而莫揀其窮而后聖人之心真窮孔子曰吾其

為東周乎曰吾久不復夢見周公

周至德論上

按聖人尚論是勘古刑書成獄文法一字不可易
即春秋竊取之義乎于周德亦曰三以國讓曰三
以天下不曰服事殷曰有二服事儒者知天下之
義亦知有之義乎微言哉曷為有曷為以時在文
王以西伯統列侯而號召之以共尊天王則有二
者有而不有也有為服事之終臣而非有挾屬之
私人也為商有之非周有之也商紂已不能有而

文王有所不有以服事之非有所有而服事之也然則商之天下乃文王所留之天下而文王之臣商合天下以臣商也自天地以來有如此之臣乎自天地治亂以來有如此挽亂為治以治翊亂而一人留天下之運如此之臣乎蚩黃以來所絕無而湯誓斯為慚矣一毫之衆不能率以誓而強以師何其紜紜不厭于人心乃七十二戰爭天下而幾于毒矣聖人總之曰周之德可為至極無可以曰至生民以來臣德之至莫大舜文白君民

之大德事君之小心然舜之受終以順文之服事
轉逆為順轉之與順有懸矣受之於事又懸矣堯
舜見天下而文王見君臣也君臣之義大矣獨紂
賴之哉天地賴以維綱常賴以正人心賴以不死
世運賴以回世運固天地人心之一大竅係也禹
家于官之後義士猶曰衰德其變也文而革於放
之後非變承也夫誰曰不宜况夫紂之水火烈於
時日事不可同年語而勢若不可一朝待由斯而
談周之至德亘古未有也嗟乎吾以知聖人之表

周德其言微其係重以一周之德存萬古之世故
儒有曰一商一周君臣未變父子相反時幾何而
三分之以服忽為八百之不期信耶虛耶至耶不
至耶雖然以一人之德存三十之世一伯事殷而
牧野延五伯匡周而洛鼎奠身服于前世食于後
人患無德天未嘗不與之報也又有曰東西之周
文武之象也不信則觀于撥懿裕溫唐之宗宋之
祖好還之天驗不驗耶小者內報于臣子大者外
報於夷狄周三世德留之而尚不足匹夫欲一日

權竊之而有餘。天安在乎。王命所以有作。

周至德論下

予嘗曰。天地之變。莫大於革命。命順革。順命逆革。逆逆而順。相成也。湯武是也。革與服相反也。文王是也。革之時大矣哉。危矣哉。其間難言之矣。聖人難之。微之又參之。酌之。世按之。義律之道。要之。命曰。應天順人。以定命。曰。未善為盛。以尊命。曰。至德。至德以凝命。有在世。有在我。有我。持世。有世。持于我。世我兩持。義相承。事不相待。不待者。人用承者。

天用維天之命人所不得違也而不謂承天而承人乎天道變可革人道不變不可革聖人以世通其變而以道持其不變歸革于時曰救世也道不以世移者也有為正其道持其世則聖人亟表之曰存道亦存世世以人定天者也必以人革天天下將亂不可止吾壹恠夫乘世立言者之竒而不信也曰大統未集西伯陰行善將文王實且有革心而有二為盜乎哉盡信不如無淆亂折諸聖翊世者顯美功借父以成子論世者表隱德定臣以

正君非一聖一賢服事盡歸立案以定萬世文王
太公之交真為操或之實口乎孰送而白諸孰送
而白諸

養子論

嗟夫古來蕩子惡少年不類敗先德蕩門戶扞罔
非命人皆知過于子也曰家鮮由禮曰教亦不善
顧獨真不善哉抑不教者棄之抑又教之以為棄
之亦嘗觀間不寸之說曰不中不才世之頑子弟
無甚焉未至甚而棄之其丈尺乎我與于不中不

才之甚矣絕天地之脉殘祖宗之傳悖君長之訓
而矣萬物之性燕之乳子必飛鷄之伏雛必啄牛
馬之育駒犢必引走未能哺之方能試之已能猶
領之頤之復之佃還終日再四而後已不棄也人
有似續之延生業之付服養之以終鳥獸則無矣
所以惟人為靈天地之德在焉曰生也宇宙萬古
生生而不已生之謂性其必非于形之謂矣性以
成形即以養形鳥獸不忘教其于養而成之人乎
曾三年之懷而棄于終身萬世之養乎既富方穀

式穀似之穀善也祿也人以善而祿也君之于人
非同生蟲之於蟲非同氣一於生氣而曰養不善
天地之生以來無此道頑之獨殊于生氣乎賢之
自棄其生耳丹商非棄于堯舜棄于堯舜之天下
天下神器聖人為神非為盡不神以為天下非為
子何見其人必兇惡不類兇惡不類一于一臣禪
孫之間多故矣武庫管叔之非子弟乎其不免于
東之征文王武王之不幸也而周公成王之所以
賢也迂身以善抗法以教失于破斧得于負斧故

師也父兄也同於父之氣于化不幸則繼于父之
生為化如是而天地之生盡宣王吉甫之逐秦之
懼選鄭之惡養一也皆不仁于天地之生敢問養
有道乎曰有農養穀園養木牧養牛園養馬聖人
養萬民人皆知養之養而不知養以道之為養道
養生以養人天下之梁肉裘帛極心意以奉形骸
少乎哉而之生以厚老氏曰死十三是以虎養而
非以子養者也吾得皇極矣家人嚴君焉父母之
謂也有為有猷有守皇念之不協不懼皇受之受

之養之也疇匪皇衷我不敢言庶頑之冥凶疇莫
帥得從我不敢言敷同之能日功沈潛高明用克
正弗友燮友用克逆作福作威用協懼正反克極
是以家人初閑而中譎也厲吉而終又威也天地
不能無秋冬帝王不能無刑罰農圃不能無蓍蘄
牧圍不能無穿策性近習遠移人不免慈毋午子
自古誠之矣人靈蟲也轉器也內轉神氣外轉誘
觸俄而固俄而徙俄而正俄而耶俄而塞閑俄而
退上形與性常不相謀也少與長常不相狎也賦

德者必于愛傷行者必于情斲性者必于形悞生
者必于少勞之來之匡之直之輔之翼之又從振
德之君道乎余父道乎余未盡乎道皆以教為棄
者也

孔子夢周公論

至人無夢聖人有夢乎聖人無幻夢有神夢寐也
寤交覺也神開識縮之乎而不真晝之所思夜之
所夢真結之乎而不神其寢不夢其覺無憂神忘
之乎而神有不忘者存其夢不夢也神之所通自

通也而吾不知其通曰鬼神將通者其思者曰至
誠如神者其不思者神官形神舍形故心為神宰
為天君其君不入室者動有引之靜則如如而來
矣凝凝而存矣於是神出有神遊有神照有神
告夜之息也大靜也神不守者鬼入而幻之其守
者神出而通之故夢之于人大矣通神即以驗神
凡人之通神于平旦聖賢之通神于夢寐從幻而
得惺惺而未嘗幻也江湖之水澄而後清山下出
者不澄也燭鬚眉映天日故水清若鏡至人之心

若鏡無所不照而已矣然則夢也神之照乎人之
照鏡天之照日月大地山河無不象焉精禳灾祥
無不告焉衆人翳之聖人通之何徵哉徵于夢矣
夢飲酒且哭泣夢哭泣且田獵其幻也反也不神
也華胥之遊蝴蝶之化斯神乎不夢之夢乎旁求
之形非熊之駕周公之見神乎其夢之不夢乎乃
殷周以興王而孔子以老行也故曰吾衰不復夫
聖人無幻夢有神夢神有結通夢之思之神結之
而不夢之不思之神通之夫子所以憮而嘆也抑

朱太復乙集

論卷之二十一

十九

周公謚文孔子追謚亦曰文六經皆出于周文哉
文哉周公啓之孔子成之大成之聖神在茲乎

朱太復乙集卷之二十一終

朱太復乙集卷之二十四

五湖朱長春太復著

文

丙申

墓碑

丁母李安人墓碑

母姓李氏其先世相傳漢隴西故族也後入蜀宋
工部侍郎心傳徙吳為吳興人八世再徙東山
家日息為鄞富人又五世有贛州公鶴以家舉聞

仕為贛功曹配陸孺人孺人亡子女子子為母十
四歸丁大夫僉使公明年生子舍人君又十年僉
使公成進士兩令南陵寶坻以胤封孺人尋入為
廷尉又三年遇

皇長子恩進封安人云又四年而舍人為進士僉
使公出按江西三年歿于官又三年舍人除中書
使陞越還今年報命奉安人北將至道病入
都一月卒于邸子與舍人交南遷經白河會舍人
于侍藥間具述安人所以病而心悲之及舍人扶

喪歸相見涕泣出自為狀屬予表墓其哀溢于口
若弗盡予傷安人憂死舍人之痛隱也輒不謝據
其志寔叅所聞詮次發幽而叙之安人生而淖清
內婉惠寡咲言閑于衿悅恒居穆如也而孺人一
乳然畜之嚴故出于豪而甘苦外事王舅湖南公
舅雋林公內事姑吳太安人及于王庶姑具曰新
婦宜太安人繼也當歸陸孺人約曰謹事之必如
真已而習太安人長者私獨喜願安人實旦暮將
適而委承之相得甚驩有兩姑與居諠諠周旋及

嫁而鍼緝左右之脫珍御助其媵有四小郎稚少
俱二十年以上呱呱在把中嗣嗣以長長而分輒
勸大夫推所美好厚讓之之大姑且死撫其孤小
姑女其女傍以逮上下宗黨婚姻家分甘食貧緩
急恆其私每至歲時及慶喜集燕動小男女亡慮
數十人人人樂安人曳裳索果脯至擁膝不聽行
安人薦于恩而善慈煦咻下體人出於性也以至
臧聚奴產作昏任勤無不邑憐見于邑曼弱不勝
衣能自束于禮勉弗懈習以勞敦以儉以奉家政

蓋丁自大祖起于農家力本業能苦其身以率家
衆耕織生息致富鉅萬湖南公嗣之守以居積倍
息老益勤性厲嗃嗃繩其子孫子孫嚴事之如事
官府安人逆姑菴耕上進食跪拜前歛衿僕僕側
而視倭舒而行每昕明起居于寢每必鷄鳴篝燈
而盥笄也服三澣衣飯厲食不過二噐兩舅喜曰
婦可謂能茹辛矣刺績機杼總總蚤夜不自休倡
其婢媵赴于公家又喜曰婦可謂能任力矣以至
貴且老服為常大夫與舍人時勸息弗聽曰人與

苦生耳吾尚愧敬姜而謂我逸乎大夫令兩縣安
人與同忍堅內行不至汗在廷尉舍五年廷尉至
冷局也而安人督其婦減手治紅令僮賣諸市以
佐祿賓客不時過咄嗟辦多得美餚酒客皆悅大
夫忘貧時時向曰勞劇哉謝阿婦之善成吾庶也
安人殷於情慤而專內外至孝方在南陵雋林公
病聞請于大夫奔歸曰徃代侍藥必救翁歸既亟
剗股齋以進泣曰吾殆負大夫也事吳太安人食
必嘗衣必指紉而居常薦念陸孺人孺人家日落

有異產兩弟拙生無訾省而贛州公老乃死於橫
贛州公為人大度豁如也席厚財好施舍任義自
喜俠揮金結客所至周人困乏客造廬請事戶外
常數十履為旨酒潔厨食四方至其里無不飲食
公而公名施旁近縣稱豪長者然亢倨自負睚眦
不宥為人下家以好客晚寤不如中人而氣不衰
鞅鞅陰賊者至不能容遂以小訟口舌忤官府有
媾之刑死安人號曰人殺我父已歎曰誠如人言
生女緩急無可使緹繫女休為誰乎會僉使公方

赴官江西而安人獨留營葬之自是忽忽不得止
何僉使公復卒安人居事陸孺人俞謹兩弟俞
貧漿飲餼膳日而致繁薪旬而致衣被月而致孺
人依安人以安十年安人念至輒號呼父涕泣甫
艾浸羸舍人無以解也為言百方迎養而北冀小
寬安人已發俞痛曰嗟兒信愛母而吾獨如母乎
地下者寬已乎行月半食損一月病再月病甚
入邳卒臨訣言革猶瞪目呼呼曰母母遂絕喪歸
吳太安人陸孺人臨哭皆墮而甦諸叔諸姒若諸

婦男女奔哭百里哀聲屬於道道之聞者曰獻哉
下毋為善宜此乎安有天道柰何不壽也

外史氏長春曰舍人告我婦人善不踰梱無飾美
夫關雎王基也房中用之書云孝乎是為政賢
豪大夫往往樹烈彪鉅而隱行儆閑家願獨難耳
餘不足觀也已以所聞安人靜惠溫薦富貴家至
難其敦于所生古孝女何嘉焉吳興太湖有兩家
東朱公西丁公同時起貲素封長者吾家三世而
徵舍人守富五世兩世顯因傳安人詳其家風乃

勤儉保家之主哉事天莫若嗇信乎舍人又曰安人母儀肅兒時衣偏敝呵箠之至不嚴大夫而嚴母以仕督誠不廢舍人賢夙成有由哉因是追先孺人哽涕慕不已已

丁酉

墓誌銘

亞中大夫雲南右叅政張公墓誌銘

張公名斗字景升其先世汝南宋南軒先生之流裔也自七世祖八九翁博士烏程而家焉代有明

德其王大父琰以明經令武城王父錫則隱君子也錫生柏邑弟子薦行著于鄉以公封中憲大夫為介石先生配廬封太夫人五丈夫子公行二內識冲敏而貌逡逡不欲為先人當少為諸生數異等有名而出嘗俛首抑自下嚮嚮謙訥不言業望之樸如若少文也者蓋其得于父天性也起家毛氏詩成進士主事比部遷郎比部故冷局居數歲一衣三澣羸馬救篋恒杜門有以自守論事公卿間恂恂自不能出口同曹諸郎號為周廉長者尋

長安市中愛富人甲犯大辟屬公治豪故多聲援
徧行金錢託要貴人送大司寇居間公持不可司
寇故讞其獄下諸曹郎雜議豪隨以間夜進二千
金抵舍為壽怒拒去竟寘辟由是京貴人諸豪無
不自憚公是恂恂者為衆人故不可測會江陵之
獄起諸當出守競游說求免荊州公獨無言而主
爵用公磔臣豪謂公長者不喜事事卒不可奪遂
行為荊州太守荊州自江陵攝國十年來政治飢
撓苟一切州人知有相君不知有吏太守以下奉

唯阿其耳已奸右權託紛出及敗根連繩引結累
數千家旁郡邑騷然公至治敦靜如故撥簡盡凝
然一郡憑以安所讞寢故牘緣蔓數十事告訐之
風立息而中使者所按責故相家藉入外旁引逋
償猶簿負數萬有奇相輔

少主十年明毅持法斤斤不侵天下肅然 朝廷
之政出千一獨嚴主斷敢行及苛嫉異太過耳用
刻廉務名臧入不當分宜什二公雅重其政能家
既無直輸株繫累累心邑憐之設權宜規措多方

先大德乙年 卷二十二 二
不漁民而額足人皆謂公厚公果長者然壹意廉
廉守堅約條具婦宿實而用覈平當塗無所啓口
大豪宿猾不刑而謹歲大祲人相食發倉為粥以
食老弱餓者而調募壯丁築沿江大堤開棧道廉
于官活幾萬餘人歲開宗室祿數萬以諸縣所上
權封給邵舊羨版為例自公始宗人至今戴焉居
五年遷中順大夫閩按察副使數月以封公艱歸
五歲復除黔黔于天下一九耳眷遠仕非所好也
徃徃見徙者逗邵觀望兩司署空十七公到兼館

四綏糖黔地大半簿書徵會旁午奔命夜以繼日
會務前情龍叛劫殺內地往朝廷遣大司馬
邢侗治兵經略用調停羈縻祥示柔服而陰跋扈
曰甚計尚望風肘足懷異謂王人萬里外亡如
我何于是公有養古寨之役養寨者麻哈平定司
鄰保王華轄苗也華故以隣種爭地抗命奪官已
益縱諸寨椎剽劫窺援無厭公陰集督漢土兵萬
餘人夜襲其營一戰破瓮里斬華再戰入兩養寨
俘殺沒黨百餘人徙其屯軍興一月藉兵于讐言因

糧于敵國中不聞調輓三首立平苗夷相我噉指
謂曰華衡命竄略小桀耳一朝公治幾以種誰當
跳梁大不逞謹無犯張公事聞

天子以為能 制賞白金一斤主爵紀功尋遷亞
中大夫右紫政治滇中公性薦孺慕老不衰自封
公歿抱陟阼之憾太夫人年已七十矣徘徊侍膝
下不忍去結廬有終焉之志故遲不赴 關以太
夫人敦迫起家又得黔去吳七千里道險既不能
奉太夫人賦東征居黔三歲日夜悲吁將毋難于

避險請免及遷滇命遠遂棄官歸萬歲暮山行日
倍道馳二百里而公以居逸勞苦用兵已病矣車
趨五十日還臈抵武林郵舍夜酌酒西望自慶曰
百里即吾北堂矣喜行歌若不勝踴踉起舞三更
醉就寢卧亡何長嘯一聲卒公居生泊唯小嗜于
酒平時齷口訥訥飲露醉間大言當世慨據或卧
地意態自負落落醒輒自悔曰狂悞居家治垣屋
不飾白糝土甃倚市中晏如也車敝結而乘之衣
敝補而服之日膳一噐一蔬終年希置酒燕會雜

賓豪客不至于門焉性靜退不能甚工治生業于
吳薦紳家得中下而力甘苦儉節惜財疑疑靳施
與每宦歸蕭然自薄所分少昆弟無多財諸季有
不信輒自啓鍵倒橐而視或小誚讓爭攘公亦不
校也外貌踽踽而內能容隱人如此常一日乘輿
過公府少年狂諸生十餘輩悞倚酒要辱之市擲
瓦甃毀輿至于冠公但拱手謝唯唯叱引避竟不
問人以此盡信公長者

外史氏曰人材各有長個儻達節大略故非為介

馬繩之內道也張景升子鄉舉同歲交三十年未嘗見厲言怒色雅稱恂恂長者官所至持大體文守居鄉粥粥若不能及一旦建謀治兵擣諸夷霆迅雷疾顯功邊荒間抑何武與固其平時自負慷慨耶人實不易知今揚首橫黔蜀間殺吏陷城守臣將士罪徙亡筭誰能張膽設竒一矢相加哉大抵夷難以中國治夷人不治亦王人自治失耳折其強梁隨其曲傳平其讐訐賞其小過剪其大雄亡黷市亡挑釁亡邀功亡養禍亡生戎心戎乃無

惠公生于

云

銘曰於戲吁咨物運終盡人益奚極壽躋三階
行媿萬石金章未舄出叅九伯儒者發家庸已
得百齡一瞬九垓一室中殖安憾歸骨安戚峴
山東浮山北兩餘之水激以挹樂哉丘爰教爰
息魂兮來歸茲而宅

處士羅長公墓誌銘

道民長春曰嗟乎天下穰穰熙熙誰能外利乎自
昔譚隱者率用右貧約而鄙富厚夫巖穴之士薦

行務內脩淡泊之業濁棄勢利甘節晏然此誠至
貞聖人所稱樂焉若其天損困憊無聊力軟智頓
詘不自給咨嗟槁顙而偽託仁義所謂無竒士之
行而長貧賤足羞也富亦有道焉材術有所見禮
義有所生恩澤有所施故曰君子富好行其德得
勢益章身有處士之義而取給焉此其人皆有所
長願用之何如耳予樸拙仕廩給食不能為富然
不訾富訾其好富者不好而以行義著善備名稱
於里巷何害焉抑處士之次乎吾友孝廉黃貞父

貧而賢顧獨時時言其鄰富人羅公兄弟似長者
兩子為門人長公歿而貞父列狀屬于志于信貞
父讀而歎為之傳長公名應賢字子仁別號鶴亭
先世汴人

高帝時羅一公徙家武林數傳為敬敬生華華生
昇曰伴山公四子公最長五歲通孝經小學不竟
會家落輒嘆曰為儁困人將不能奉吾親棄去學
賈十二以負薪市中養其家尋乃翁以中表犯鹽
官獄株連論城旦明州仲年十三匍匐過江請代

原缺

亦醜甘苦至奉翁媪不敢見不鮮翁喜客時呼召
里中父老親故人飲每會盛張設兩人身自奉壺
持栲觴上壽膝席徧行酒佐歡樂之至夜分必正
襟倚眎寢命退乃退所携四方之物必緘泥歸上
翁媪嘗乃嘗之及死號毀喪葬如讀禮人歲時集
子弟言先世至父母時未嘗不嗚咽罷酒長泣言
負負養不待也公與仲既俱用賈人起家相勞苦
如左右手合釜而炊者垂六十年嘗客吳仲中寒
欲死獨念見髯兄公遽聞間道從太湖趣行晝夜

三百里遇盜迫之以計脫歸就榻為稱水燒藥仲
霍然起仲性鹵為氣居時逢公公咲領之仲隨跽
以謝驩如初白首無間常勅子輩事仲父如父仲
母如母吾乃安愛其稗季少為薦教長為生聚推
橐中分予之既天而贍恤其屢以安其孝友淳至
如此固天性抑非富有財何所為悅乎故曰禮義
生於有而廢於無傷哉貧也可歎焉然世之席世
業分田宅爭奪抵諍父母兄弟相閱成仇讐不可
勝數况其空身攻苦力業如公者嗟乎豈非長者

哉公器沉厚外不見個儻忼慨而族姓袒免以下
陰務封殖之及于歲屬閭巷緩急得走馬有逋責
即不至焚券頽亦多不問道遇籠中禽探囊錢買
縱之見其飛舉為樂咲見句寒者解衣之溫言接
人與與負氣者對之不覺飲冰州里人知不知皆
稱羅長公善士此所謂息澤有施富而行其德者
也少貧壯乃有室數不利于子嘒然曰弟兒即吾
兒嗣仲子大章懷撫之以逮于群送如生年四
十三買兩妾舉五丈夫子公嘗過廣陵附賈人舟

夜半主人處子引燈啓船窻目挑公公祥軒卧不
動旦忘謝主人去絕不言晚年舉以戒兒輩終閔
其姓先是日者占公直華蓋法無子至是聞者曰
長公固陰行于是乎知有天道公兄弟皆有才以
貧學書不成輒恚恨曰漢法賤賈人子吾為急口
實耳有略不得用當以寄兒已饒財不怯金幣縱
其諸子游學所師友都名士而從黃貞父受朱氏
易歲辛卯從子大冠與其師貞父同舉鄉子大儒
為名諸生詩書文學彬彬羅氏遂始為儒門矣錢

唐富人皆推讓羅之雍容而長公兄弟行曰積名
日以聞亡何仲死公素伉健自傷仲忽忽如失病
浸作猶曳杖婆娑戶外丙申九月晦為公七十生
日諸親故父老薦紳先生士人與子輩遊者並集
篋綺繡持酒漿入門扶公坐設席以次舉觴上壽
未出戶而公淡作不起客相顧失色旁皇出更白
衣冠進哭甚哀相與曰公故嘗德吾等故以是日
集杯酒送之歌于日哭于日聚國族于日異哉及
喪臨吊者遠近數百車大氏其子侄客也傳曰以

武一切用文持之事有相待而成相得益章使長
公兄弟終身為寡人不能使其子成儒子不能儒
顯兩公名亦未必著所謂得勢而益章非乎其善
諸子貞父有力焉乃知富亦有道乎要亦必文守
為心

銘曰桃源中左湫右峰納湖帶江閱而宅勒而
幽德昌而子孫封殖木弗零羊牛弗登山弗崩
而宮永寧

誥封鄭宜人墓志銘

中丞景渠李公元配宜人鄭故郭桐汭蘭塘里人也其先世巽於閩自州博士習古公來官愛其山水止家焉是為蘭塘鄭別子再傳川起素封巨萬個儻任俠一州賢豪皆下之四子鴻臚公一峰其季也少為名弟子高才用數困憤入貲為郎娶苗生三女宜人最長生而嫺秀骨相甚奇嘗為伯父夏邑令松泉公所異曰兒男也當亢吾宗今亦當八名貴人阿翁弗與凡長隨從女兄弟治女紅咲效不出於拙十五歸中丞生于富人家年少入謂

不習為婦而宜人故益博上下無所不諧身自操
作茹辛攻苦中丞奮于學每晨起炊糜勸讀夜績
絀張燈以伴咿嗶宜人天性莊而容好都雅稱詩
碩人中丞為諸生有聲文燁然而美儀觀白哲望
之如神仙兩人深相得薦于倫又邑勉相督也曰
無令長為經生婦白首抱黃虀白翁故貴廉吏產
日落每中丞游學宜人輒脫其粧治行曰君儒也
寧須此富家兒首飾不為儒資而盜誇乎年二十
四中丞舉于鄉明年成進士令蘭谿宜人沒已遷

南京戶部主事滿封安人尋改吏部司勳郎會
天子覃恩進封宜人出為九江太守三年遷副使
治惠潮鄱兵事會翁病中丞請終養宜人從侍藥
湯甚劬也何宅憂園居十年餘丁亥

今天子有旨即家以故官起巡閩漳南宜人奉姑
從已遷守嶺南南海瘴遠宜人侍姑居家已進江
西按察使移右布政宜人從姑官下已遷楚左布
政七月拜御史中丞撫楚又七月宜人疾卒于官
宜人夙慧說文史女時從夏邑公授孝經內則列

女傳諸篇及侍中丞讀書稍稍從傍詰難輒通北
義累歲月學益富每一譚說按以傳記緣以辭意
門中呼為女儒間嘗與中丞商榷文事徃來雅斌
斌焉中丞曰此吾內友也而折節厲搯動援古人
自督忍詬抑性生平不見非意每施舍不任德輒
見侵厲輒復予慰謝嘗謂二子曰昔言寧我負人
無人負我奸雄耳士君子須我不負耳何問人以
故終其世幾微無間言所引善傳古義會證時事
相中丞仕三十年中丞每每與論政事居官所以

輒一微言輒中解往中丞用嚴治蘭谿宜人從聞
曰令父母也小苛乎中丞曰巖邑積弛亦宜人曰
此言民殘糾之以猛耶張而不弛文武不能也天
下關在往往金錢半沒而淮陰南北轉輸大都會
也中丞至盡蠲浮苛以惠商宜人喜曰甚善吾聞
君子非無賄之患而無令名之難與彼幅利而墨
毀官拙婦羞以為夫則妾受君榮焉九江俗賤買
女官其地者往往市為妾奴都尉私輒為太守買
數十指以獻宜人聞輒拒曰令甲官不得役其部

吾三女寧使跣而身爨義不受一郡詫服及中丞
中隱考槃義蒼谷中學長生之術宜人亦夙好黃
老言年未四十相與烟霞古處自命曰清淨屬不
復意人間世矣而

天子詔起中丞中丞不欲出宜人又輒曰毋在也
古人奉檄而喜抑金馬門避世者非仙耶遂奉毋
以行及撫楚會楚王為盜俠誣匿其先故侯家名
寶珍異黃金累臣萬奏

天子

天子遣大璫乘傳往按其辜楚王震怒遜于野中
丞為疏既具宜人請讀中丞難之強而可乃曰往
者君棄官也蒙

上恩至此今

主上為奸焚殺傷宗誼而以黷聞中丞奮身明寃
以報

主之目也事有不測義勿得顧矣中丞咲曰吾故
知若非啼牛衣婦也疏入尋事亦解而中丞遂稱
病乞罷宜人喜曰昔侍父今將母孝哉可謂承其

權輿妾為君製野服成矣以今君亦固當隱且十年從田間出建牙鎮節一方幸庶無辜人生亦是矣便當逍遙從安期羨門于世外吾領子婦為君外護耳疏三上未報而宜人病革卒之夕中丞坐于篋長子敷章立于牀下聞哭音睜目曰死歸耳叱辟無怛化中丞未了耶其懸解宗會如此乃知宜人雅深于道也中丞言沒後遇事中夜輒見景響語了了如平時家人遂謂尸解仙去云宜人多才拮据田園廬舍盡識其處事無巨細指畫籌策

婢僕拱手貫行而已居恒無呵呼而下廩然內政
肅葭莘之屬歲時會于庭一揖輒退不交一語師
巫佞佛不入于閤病劇于婦跽請禱竟弗許性儉
然好潔燕私服食即可享見賓客無煩更置也中
丞每宦遊僕夫無百數為治者酒人人必厭所欲
尤敬事文學賢士手調而進食晨夜遣蒼頭俟起
居必謹故兩子皆賢有文游交日廣四方之履錯
于庭也及喪會吊之車以千

外史氏長春曰吾入道七年周咨天下大宗師知

桐川李先生年六十童子容髮纍纍腹珠超躍陵
數尋浸假遑興耶適先生屬志宜人乃明早服有
陰助焉先生世名鄉清節標率世能言莫能知宜
人相之然要以貞勤護道為上德兩人豈其夙因
道種耶予交先生從子文學熙華然予言容觀飄
然兩絕物表作合度世內為師友非天乎先生得
道之易有以也

銘曰青牛西邁玄牝東留仙李枝璠世毓聖流
天目神區降真斗樞夙根天作金母之姝紫鳳

九苞青鸞五采交飛翩翩仙姿物外咏詩謝女
論政許婦敬姜勤績德耀素布居貴甘潛養華
嗜泊載驅載旋考槃介石誰助夫子脩子古尼
早服雙脩鬪觀得侶竊籙爰盡白雲大歸景簪
竒光曰是曰非胡然空衣胡然委骨元龍寒秋
伊麓維定逝耶解耶觀化冥冥疇曰定之際維
先生

朱太復乙集卷之二十四終